

CONSELLERÍA DE EDUCACIÓN E ORDENACIÓN UNIVERSITARIA

Orde do 15 de febreiro de 2007 pola que se convocan os premios extraordinarios de formación profesional específica de grao superior correspondentes ao curso 2005-2006.

Orde do 15 de febreiro de 2007 pola que se convocan os premios extraordinarios de formación profesional específica de grao superior correspondentes ao curso 2005-2006.

O Ministerio de Educación e Cultura creou mediante a Orde ECD/1696/2002, do 1 de xullo de 2002, os premios nacionais de formación profesional como recoñecemento ao alumnado que rematou os seus estudos de formación profesional específica de grao superior.

Así mesmo, no artigo terceiro, a citada orde establece que poderá concorrer aos premios extraordinarios nacionais o alumnado que resultase merecedor dos premios extraordinarios convocados na súa comunidade autónoma nos termos que se establecen nesa norma.

Na súa virtude, co obxectivo de recoñecer os méritos baseados no esforzo no traballo do alumnado que cursou estudos de formación profesional de grao superior na Comunidade Autónoma de Galicia, cun excelente resultado académico, a Consellería de Educación e Ordenación Universitaria, facendo uso desta habilitación e das atribucións que ten conferidas, e de acordo co disposto no Decreto 287/2000, do 21 de novembro, polo que se desenvolve o réxime de axudas e subvencións públicas da Comunidade Autónoma de Galicia (DOG do 11 de decembro).

DISPÓN:

Artigo 1º.-Obxecto.

Convócanse premios extraordinarios de formación profesional para o alumnado que realizara os estudos de formación profesional específica de grao superior no curso 2005-2006 nos centros docentes da Comunidade Autónoma de Galicia.

Artigo 2º.-Número e recoñecemento.

1. Poderanse conceder ata vinte e dous premios extraordinarios, un por cada familia de formación profesional específica.

2. O alumnado que obteña o premio extraordinario recibirá un diploma acreditativo e o secretario do centro docente onde estea depositado o seu expediente anotaralle esa distinción neste último. Así mesmo, o secretario do xurado de selección farao anotar no libro de cualificacións mediante a dilixencia correspondente. Para iso, os interesados deberán enviar, no prazo de dez días contados a partir do día seguinte ao da publicación da citada resolución

de concesión dos premios, o seu libro de cualificacións ao Servizo de Avaliación e Calidade do Sistema Educativo da Dirección Xeral de Ordenación e Innovación Educativa, edificio administrativo San Caetano s/n, 15781, Santiago de Compostela.

3. A dotación para os premios será de 16.104 € con cargo á partida orzamentaria 09.02.423A.480.1, que se distribuirán entre os premiados na mesma contía, e que non poderá exceder de 732 € por premio. Estas contías estarán suxeitas ás retencións que legalmente lle correspondan.

4. Os alumnos que obteñan o premio extraordinario de formación profesional poderán concorrer, logo de inscrición, ao correspondente premio nacional.

Artigo 3º.-Requisitos.

Poderá optar aos premios extraordinarios de formación profesional o alumnado que cumpra os seguintes requisitos:

1. Ter rematados os estudos de formación profesional específica de grao superior no ano 2006 nun centro docente da Comunidade Autónoma de Galicia.

2. Ter obtido unha cualificación final media de todos os módulos igual ou superior a 8,5. Esta cualificación final obterase como media aritmética das cualificacións obtidas nos módulos que compoñen o ciclo formativo, non computándose o módulo de formación en centros de traballo que se cualifica en termos de apto ou non apto, nin os que foran obxecto de validación.

Artigo 4º.-Prazo e documentación.

1. O alumnado que, reunindo os requisitos indicados, desexe optar aos premios extraordinarios, deberase inscribir na secretaría do instituto de educación secundaria no que se atope o seu expediente académico no prazo dun mes a partir do día seguinte ao da publicación desta orde.

2. Para formalizar a inscrición deberá presentar a seguinte documentación:

a) Folla de inscrición cuberta segundo o modelo do anexo I desta orde.

b) Relación dos méritos que se desexe alegar relacionados co título profesional, de acordo co previsto no artigo 8.1º C, xunto coa documentación xustificativa correspondente. Os méritos deberán acreditarse mediante certificado orixinal ou fotocopias cotexadas das certificacións, no que conste expresamente o número de horas de duración.

c) Fotocopia cotexada do DNI ou pasaporte.

d) Declaración xurada de non ter percibido outros premios convocados co mesmo fin polas administracións educativas doutras comunidades autónomas.

3. Os institutos de educación secundaria elaborarán e xuntarán á documentación anterior os documentos que a seguir se relacionan:

a) Certificación académica dos estudos obxecto de baremo, onde se reflicte a cualificación final media a que se refire o artigo 3º.2.

b) Certificación oficial que inclúa nota media da proba ou dos estudos que lle permitiron o acceso ao ciclo de formación profesional específica polo que opta ao premio extraordinario.

4. De conformidade co artigo 13.4º da Lei 4/2006, do 30 de xuño, de transparencia e de boas prácticas na Administración pública galega, a consellería publicará na súa páxina web oficial a relación dos beneficiarios e o importe das axudas concedidas, polo que a presentación da solicitude leva implícita a autorización para o tratamento necesario dos datos dos beneficiarios e da súa publicación na citada páxina web.

5. Sen prexuízo do anterior, a documentación poderá presentarse na forma prevista no artigo 38.4º da Lei de réxime xurídico das administracións públicas e de procedemento administrativo común.

Artigo 5º.-Tramitación de solicitudes.

1. Os institutos de educación secundaria que posúan solicitudes de inscricións tramitarán estas a través dunha aplicación informática situada no portal educativo <http://www.edu.xunta.es/premiosfp>, podendo facer esta tramitación ata o día seguinte ao de finalización do prazo de solicitude.

2. Finalizado o prazo de solicitude, os institutos de educación secundaria remitirán por correo urxente, ao Servizo de Avaliación e Calidade do Sistema Educativo da Dirección Xeral de Ordenación e Innovación Educativa, as solicitudes de inscrición xunto co resto da documentación.

Artigo 6º.-Emenda e mellora da solicitude.

De acordo co establecido no artigo 71 da Lei 30/1992, do 26 de novembro, de réxime xurídico das administracións públicas e do procedemento administrativo común, modificada pola Lei 4/1999, do 13 de xaneiro, se a solicitude de inscrición non reunise os requisitos precisos ou non se acompañase da documentación indicada no artigo anterior, requirirase ao interesado para que, nun prazo de dez días, emende a falta ou achegue os documentos preceptivos, con indicación de que, se así non o fixese, se terá por desistido da súa petición ou, se é o caso, non se valorarán os méritos que non estean debidamente xustificadas.

Artigo 7º.-Xurado de selección.

1. Para a análise e valoración das solicitudes constituirase un xurado de selección presidido pola directora xeral de Ordenación e Innovación Educativa, ou persoa na que delegue, e integrado polo xefe

de servizo de Avaliación e Calidade do Sistema Educativo, o xefe de servizo de Formación Profesional, e funcionarios dos corpos de inspectores de educación e/ou profesores de ensino secundario das especialidades de formación profesional específica, designados polas direccións xerais de Ordenación e Innovación Educativa, e de Formación Profesional e Ensinanzas Especiais. Actuará como secretario do xurado, con voz pero sen voto, un funcionario da Dirección Xeral de Ordenación e Innovación Educativa.

2. A percepción de asistencias deste xurado de selección aterase á categoría correspondente segundo o disposto no Decreto 144/2001, do 7 de xuño, sobre indemnizacións por razón do servizo ao persoal con destino na Administración autonómica de Galicia.

Artigo 8º.-Baremo das solicitudes.

1. Os premios concederanse en réxime de concorrencia competitiva. Na valoración final o xurado terá en conta os seguintes méritos:

a) Nota media do expediente académico do ciclo de formación profesional específica polo que se opta ao premio extraordinario.

b) Nota media da proba ou dos estudos que lle permitiron o acceso ao citado ciclo (bacharelato, formación profesional de segundo grao, outro ciclo, proba de acceso, etc.).

c) Outros méritos relacionados co título profesional.

Para os efectos de valoración só se terán en conta as actividades relacionadas directamente cos contidos do ciclo formativo correspondente e obtidos con posterioridade á súa matrícula.

Os cursiños organizados polas administracións educativas que se atopen en pleno exercicio das súas competencias en materia educativa, por institucións sen ánimo de lucro que fosen homologados ou recoñecidos polas administracións anteditas, así como os organizados polas universidades, desenvolvidos durante o período no que se cursaron os estudos que posibilitan a presentación a esta convocatoria valoraranse con 0,2 puntos por cada 10 horas de formación, ata un máximo de 7.

Outras actividades de formación valoraranse con 0,1 puntos por cada 10 horas de formación, ata un máximo de 3 puntos.

2. Os puntos 1.a), 1.b) e 1.c) deste artigo estarán expresados numericamente do 0 ao 10 cunha cifra decimal.

3. A valoración final expresarase numericamente con dúas cifras decimais e será o resultado de aplicar sucesivamente os factores de ponderación recollidos no anexo II.

4. O xurado resolverá os empates tendo en conta os seguintes méritos e por esta orde:

a) Nota media da epígrafe a) do punto 1 deste artigo.

b) Cualificación do módulo de proxecto integrado, no caso de que forme parte de todos os ciclos da mesma familia profesional.

c) Nota media da epígrafe b) do punto 1 deste artigo.

d. Outros méritos relacionados co título profesional.

5. O xurado poderá declarar deserto algún dos premios.

Artigo 9º.-Proposta de concesión dos premios e publicación da resolución de adxudicación.

1. Antes de quince días a partir do remate do prazo de solicitude o xurado de selección confeccionará unha acta provisional coas puntuacións finais dos aspirantes e os méritos xustificadas, que se fará pública nas delegacións provinciais e no portal educativo da Consellería de Educación e Ordenación Universitaria.

2. Os interesados poderán reclamar por escrito contra a puntuación outorgada polo xurado de selección mediante instancia dirixida ao seu presidente, no prazo de dez días hábiles a partir do seguinte ao da publicación das actas provisionais, e remitida á Dirección Xeral de Ordenación e Innovación Educativa, edificio administrativo San Caetano s/n, bloque 2, 2º andar, CP 15781 Santiago de Compostela. Copia da cal poderá enviarse ao fax: 981 54 65 42.

3. Unha vez resoltas as reclamacións, o xurado elaborará a acta coa proposta definitiva de adxudicación dos premios extraordinarios. O orixinal quedará arquivado na Dirección Xeral de Ordenación e Innovación Educativa e remitirase copia á Dirección Xeral de Formación Profesional e Ensinanzas Especiais así como ás delegacións provinciais da Consellería de Educación e Ordenación Universitaria.

4. De acordo coa proposta feita polo xurado de selección, a directora xeral de Ordenación e Innovación Educativa elevará a dita proposta para a publicación no *Diario Oficial de Galicia* da resolución de concesión ditada pola conselleira de Educación e Ordenación Universitaria.

5. O prazo máximo para notificar a resolución deste procedemento será de seis meses, desde o día seguinte ao da publicación desta convocatoria, tendo efectos desestimatorios a falta de resolución expresa nese período.

Artigo 10º.-Recurso contra a resolución.

Contra a devandita resolución de adxudicación dos premios poderase recorrer mediante recurso potestativo de reposición ante a conselleira de Educación e Ordenación Universitaria, no prazo dun mes, a partir do día seguinte ao da data de publicación no *Diario Oficial de Galicia*, segundo o disposto nos artigos 116 e 117 da Lei 30/1992, 26 de novembro, de réxime xurídico das administracións públicas e do procedemento administrativo común, ou ben directamente mediante recurso contencioso administrativo perante a sala do contencioso-administrativo do Tribunal Superior de Xustiza de Galicia, no prazo de dous meses, segundo, prevé o artigo 46 da Lei 29/1998, do 13 de xullo, reguladora da xurisdición contencioso-administrativa.

Artigo 11º.-Compatibilidade con outros premios.

A obtención dos premios extraordinarios será incompatible coa percepción doutros premios convocados co mesmo fin polas administracións educativas doutras comunidades autónomas.

Artigo 12º.-Modificación da resolución de concesión.

Toda alteración das condicións tidas en conta para a concesión dos premios e, en todo caso, a obtención concorrente doutros premios convocados co mesmo fin polas administracións educativas doutras comunidades autónomas, poderá dar lugar á modificación da resolución de concesión.

Artigo 13º.-Obrigas dos gañadores.

O alumnado gañador dos premios terá a obriga de facilitar toda a información que lle sexa requirida pola Intervención Xeral da Comunidade Autónoma de Galicia, polo Tribunal de Contas e/ou polo Consello de Contas, no exercicio das súas funcións de fiscalización e control do destino das axudas.

Disposición derradeira

Primeira.-Autorízanse as direccións xerais de Ordenación e Innovación Educativa e de Formación Profesional e Ensinanzas Especiais para ditar cantas normas sexan oportunas para o desenvolvemento desta orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 15 de febreiro de 2007.

Laura Sánchez Piñón
Conselleira de Educación e Ordenación Universitaria



XUNTA DE GALICIA
CONSELLERÍA DE EDUCACIÓN E
ORDENACIÓN UNIVERSITARIA

ANEXO I

PROCEDEMENTO PREMIOS EXTRAORDINARIOS DE FORMACIÓN PROFESIONAL	CÓDIGO DO PROCEDEMENTO ED311B	DOCUMENTO SOLICITUDE
---	---	--------------------------------

DATOS DO SOLICITANTE

APELIDOS		NOME		NIF	
DATA DE NACEMENTO		TELÉFONO	TELÉFONO MÓBIL	ENDEREZO (PARA EFECTOS DE COMUNICACIÓN)	
LOCALIDADE			PROVINCIA	CÓDIGO POSTAL	
CORREO ELECTRÓNICO		CENTRO EN QUE CURSOU OS ESTUDOS DE FORMACIÓN PROFESIONAL ESPECÍFICA			
IES AO QUE ESTÁ ADSCRITO (SÓ PARA ALUMNOS DE CENTROS PRIVADOS)					
LOCALIDADE		PROVINCIA	CÓDIGO POSTAL		
FORMACIÓN PROFESIONAL ESPECÍFICA (FPE):					
FAMILIA PROFESIONAL					
CICLO FORMATIVO					

Desexa tomar parte no concurso para a obtención dos premios extraordinarios de formación profesional convocados pola Orde do _____ de _____ de 2007 para o que xunta a seguinte documentación (indicar cun X):

(IES)

- CERTIFICACIÓN OFICIAL DOS ESTUDOS DE FORMACIÓN PROFESIONAL REMATADOS NO CURSO 2005-2006
- CERTIFICACIÓN OFICIAL DOS ESTUDOS QUE LLE PERMITIRON O ACCESO Á FPE

SOLICITANTE:

- FOTOCOPIA DNI OU PASAPORTE.
- DECLARACIÓN XURADA DE NON TER PERCIBIDO OUTROS PREMIOS CONVOCADOS CO MESMO FIN POLAS ADMINISTRACIÓNS EDUCATIVAS DOUTRAS COMUNIDADES AUTÓNOMAS
- DOCUMENTOS XUSTIFICATIVOS DOUTROS MÉRITOS RELACIONADOS CO TÍTULO DE FP OBTIDO (ESPECIFIQUESE):

--

LEXISLACIÓN APLICABLE

Orde do 15 de febreiro de 2007 pola que se convocan os premios extraordinarios de formación profesional correspondentes ao curso 2005/2006.

De conformidade cos puntos 3º e 4º do artigo 13 da Lei 4/2006, do 30 de xuño, de transparencia e de boas prácticas na Administración pública galega, e co previsto no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a consellería publicará no Diario Oficial de Galicia e na súa páxina web oficial a relación dos beneficiarios e o importe das axudas concedidas ao abeiro desta orde; e incluírá igualmente as referidas axudas e as sancións, que como consecuencia delas puidesen impoñerse, nos correspondentes rexistros públicos, polo que a presentación da solicitude leva implícita a autorización para o tratamento necesario dos datos persoais dos beneficiarios e a referida publicidade.

SINATURA DO SOLICITANTE OU PERSOA QUE O REPRESENTA

, de de

(Para cubrir pola Administración)

RECIBIDO

REVISADO E CONFORME

NÚMERO DE EXPEDIENTE

DATA DE ENTRADA

DATA DE EFECTOS

DATA DE SAÍDA

ANEXO II

Baremo dos expedientes e outros méritos

Mérito	Documento acreditativo	Ponderación
Nota media do expediente académico dos estudos de formación profesional específica de grao superior.	Certificación académica.	72%
Nota media dos estudos que lle permitiron o acceso aos estudos de formación profesional específica (bacharelato, formación profesional de segundo grao outro ciclo, nota da proba de acceso, etc....).	Certificación oficial.	18%
Outros méritos relacionados co título profesional.	Certificación oficial ou fotocopia cotexada do documento xustificativo.	10%

Resolución do 18 de xaneiro de 2007, da Secretaría Xeral da Consellería de Educación e Ordenación Universitaria, pola que se fan públicos, para os efectos do artigo 11 da Lei 4/2006, do 30 de xuño, de transparencia e boas prácticas na Administración pública galega, os convenios de colaboración previstos no artigo 3.1º c) do texto refundido da Lei de contratos das administracións públicas, asinados no último cuadrimestre do ano 2006.

Para os efectos previstos no artigo 11 da Lei 4/2006, do 30 de xuño, de transparencia e boas prácticas na Administración pública galega, acórdase darlles publicidade aos convenios de colaboración previstos no artigo 3.1º c) do texto refundido da Lei de contratos das administracións públicas subscritos por esta consellería no último cuadrimestre do ano 2006 que se relacionan no anexo a esta resolución.

Santiago de Compostela, 18 de xaneiro de 2007.

Benito Fernández Rodríguez
Secretario xeral da Consellería de Educación e Ordenación Universitaria

ANEXO

Asinantes	Obxecto	Data da sinatura	Achega da Xunta de Galicia
Consellería de Educación e Ordenación Universitaria e Concello de Betanzos	Obras no Conservatorio Elemental de Música de titularidade municipal	4-10-2006	48.979,43
Consellería de Educación e Ordenación Universitaria e Concello de Cuntis	Obras no CPI Aurelio Marcelino Rey García de titularidade municipal	9-10-2006	60.000,00
Consellería de Educación e Ordenación Universitaria e Concello de Lalín	Obras no Conservatorio Profesional de Música de titularidade municipal	11-10-2006	60.000,00
Consellería de Educación e Ordenación Universitaria e Concello do Barco de Valdeorras	Obras no Conservatorio Profesional de Música de titularidade municipal	11-10-2006	48.440,57
Consellería de Educación e Ordenación Universitaria e Concello do Carballiño	Obras no Conservatorio Profesional de Música de titularidade municipal	18-10-2006	34.987,62
Consellería de Educación e Ordenación Universitaria e Universidade de Santiago de Compostela	Actividades orientadas á creación de muller e ciencia	30-10-2006	30.000,00
Consellería de Educación e Ordenación Universitaria e Concello de Tui	Obras no Conservatorio Profesional de Música de titularidade municipal	31-10-2006	30.000,00
Consellería de Educación e Ordenación Universitaria e Entidade Pública Empresarial RED.ES	Adenda ao convenio bilateral do 2 de xuño de 2005 pola que se incrementan as achegas das partes	31-10-2006	8.032.791,00
Consellería de Educación e Ordenación Universitaria e Concello de Caldas de Reis	Obras no CPI Alfonso VII de titularidade municipal	2-11-2006	59.996,06

Asinantes	Obxecto	Data da sinatura	Achega da Xunta de Galicia
Consellería de Educación e Ordenación Universitaria e Concello de Verín	Obras no Conservatorio Elemental de Música de titularidade municipal	2-11-2006	53.288,40
Consellería de Educación e Ordenación Universitaria e Concello da Estrada	Obras no Conservatorio Profesional de Música de titularidade municipal	3-11-2006	30.000,00
Consellería de Educación e Ordenación Universitaria e Concello de Pontearreas	Obras no Conservatorio Profesional de Música Reveriano Soutullo de titularidade municipal	9-11-2006	29.680,05
Consellería de Educación e Ordenación Universitaria e Concello de Meis	Obras no CPI de Mosteiro-Meis de titularidade municipal	15-11-2006	40.000,00
Consellería de Educación e Ordenación Universitaria e Universidade de Vigo	Actuacións no Campus de Pontevedra	18-12-2006	948.879,00

CONSELLERÍA DE SANIDADE

Resolución do 12 de febreiro de 2007, da Dirección Xeral de Saúde Pública, pola que se fai pública a realización dun curso homologado de nivel básico para a obtención do carné de aplicadores/manipuladores de praguicidas de uso ambiental e uso na industria alimentaria (tratamentos DDD).

A Orde do 30 de xullo de 1997, conxunta das consellerías de Agricultura, Gandería e Montes e de Sanidade e Servizos Sociais, polo que se establece na Comunidade Autónoma de Galicia, a normativa reguladora para a homologación de cursos de capacitación para realizar tratamentos con praguicidas, así como para a obtención do carné de manipuladores destes produtos, establece no seu artigo 8.6º que os ministerios de Agricultura, Pesca e Alimentación e de Sanidade e Consumo comunicarán aos organismos responsables na comunidade autónoma, a homologación dos ditos cursos e no seu artigo 9 a obrigatoriedade de que o organismo oficial responsable publique no *Diario Oficial de Galicia* a información correspondente a cada curso que se vai realizar.

En consecuencia, anúnciase a realización dun curso de aplicadores/manipuladores de praguicidas de uso ambiental e uso na industria alimentaria, nivel básico, homologado polas direccións xerais de Saúde Pública do Ministerio de Sanidade e Consumo e de Agricultura do Ministerio de Agricultura, Pesca e Alimentación, solicitado pola entidade *Biocontrol e Calidade Alimentaria, S.L.U.*, de acordo coas seguintes bases:

1. Denominación do curso.

Curso para a capacitación de aplicadores/manipuladores de praguicidas de uso ambiental e uso na industria alimentaria. Nivel básico.

2. Entidade organizadora.

Biocontrol e Calidade Alimentaria, S.L.U.

3. Data.

Do 26 ao 29 de marzo de 2007.

4. Lugar de celebración.

Antiga Cámara Agraria. Rúa Castelo, 10. Casal-San Xoán. Poio (Pontevedra)